

Do er auch aus solchem eingenommenen  
Bericht vermercket/das das Parth eine böse vn-  
gegründe sache habe/ Sol er ihme setnes nutz  
halben/nicht vergebliche hoffnung machen/ son-  
dern die vmbstende mit fleis/ vnnnd mit grunde zu  
gemüth führen/vnnnd darauff verwarnen/das er  
sich lieber selbst weise/ als in vergebene vnkosten  
führe.

Sonderlich aber/ sollen sie auff die sachen/  
so zwischen der Obrigkeit vnnnd Vnterthanen sich  
verhalten/fleißige achtung haben/ Dann was  
für mißuerstande/ zerrüttung/ vnnnd vnordnung  
aus dergleichen sachen entstehet/ dz giebet leider  
die tegliche Erfahrung/Darumb so sollen die Adv-  
vocaten in solchen fellen die Leute/denen sie diene  
wollen/ zu gebürendem gehorsam mit fleis ver-  
mahnen/vnnnd sich derselben sachen anders nicht  
vnterwinden/es sey dann/das sie scheinlichen be-  
finden/das die Leute hierzu gut fug vnd recht ha-  
ben/vnd das ihnen sonst nicht geholffen werde  
mag. Außerhalb dessen aber sich dero genzlichen  
entschlagen.

Es sol auch ein jeder Advocat, er diene gleich  
dem Beklagten/oder dem Kläger/sich alles des/  
so nur zu vergeblicher verzögerung der sachen ge-  
reicht/